

तिमोथीला पावलकी टिवु यिकी थल्मा

दी थेपकी कोर्ला

तिमोथी ति एशिया लुड्बाकी नाज्युड ख्रीष्टियान यिन। तीकी आमा ति यहूदी नोक, पपा ति ग्रीक यिनोक। ती ति पावलकी लेन ल्यामु ख्याप्टाक कितुप पेला पावलकी मुला राड युकुप ताड दाल्जा किटे कितुप मी यिनोक। दी यिकी थल्मा ति पावलकी ती खक्छ्येवु ताम्डेकी कोर्ला ड्याम क्यानी टिवु यिन।

पावलकी दी यिकी ति तेरी सिनाड गोमाला चर्चला वोतुप येन्देन मेटेड्बुकी तेन्दोकला टिवु यिन। तुका येन्देन मेटेड्बु ति यहूदी मी ताड यहूदी मिन्दुप मिरिक यम्बाकी नासाम नेसुर वावु तेपा मेटेड्बु वोतुप येन्देन यिन। ती येन्देनला दी जम्बुलिड ति दिक्पी क्येड वे। चो पेला मीतिवी खक्छ्येवु छ्याकला वोतुप रिक्पा हाक्माकोवे, साप समातिवा मुक्युर्वे, जेन्दी मिक्किवे, ती पेला सेक तीला थर्वा मेड्येवी सिनी तिवी सिक्का वे। तुक क्यानी पावलकी चर्चकी गोमा कितुपतिवी चुक क्यानी गोमा कि गोकिवी, चुका शब्ज्यी कि गोकिवी, तमा गोमा कितुपतिवा ताड तिवाला दाल्जा किटे कितुपतिवा चुका परकी ति वुड गोकिवी सिनी तेरी टोड्गुतिवा दी यिकीला टिनी वे। तेरी सिनाड तिड्ला पावलकी तिमोथीला तेपा कितुपतिवी चर्चकी थोक्ला कि गोवु लाकाकी कोर्ला ताड चुक क्यानी येशू ख्रीष्टकी थोक्ला शब्ज्यी कितुप मी ल्यामु च्युड गोकिवी सिनी टोड्गु बिन वै।

मुला राड वोतुप लोप्च्येनतिवा

- यिकीकी कोर्ला १:१-२
- चर्चकी कोर्ला ताड बुल्वाकी कोर्ला टोड्गुतिवा १:३-३:१६
- तिमोथीला तीकी लाकाकी कोर्ला टोड्गुतिवा ४:१-६:२१

पावलकी टसी देलेक

१ टसी देलेक! दी यिकी ति दाकपुला थर्वा नङ्गुप चोवो कोन्छ्योक ताड दाकपी रेवा क्यावु येशू ख्रीष्टकी क नेसुर खोकी लोमा छ्ये च्युङ्गुपला पेतुप ड पावलकी २वुतुड के तेपा कितुप आड तिमोथीला टिवु यिनो। पपा कोन्छ्योक ताड दाकपी चोवो येशू ख्रीष्ट नेमा ख्युरुडला कटिन ताड च्यम्बा ताड लोदिमु वुङ्शी।

येन्देन मेटेड्बु नेसुर च्याड्से देतुप कोर्ला

३ड माकेडोनिया डोप पेला ख्युरुडला डे एफिससला राड दे सिक्यावु तेन्दोक ति तेकी येन्देन मेटेड्बु लोपुप मीतिवाला तुक माकी सिनी क तेरुपला यिन। ४तमा तिवाला यहूदी गिपाकी पगावा हङ्गावाकी काड काड क्यासुड, तिवा सु सु यिन सिरुप कोर्ला साड ड्याम अला माकी सिनी क तेरुपला यिन। च्यिलासिसिन तुक क्यावु ति कोन्छ्योककी खोरे नोवाला क्यावु लाकाकी थोक्ला ताम्डे कितुप सिनाड केवुल तिराड क्यावु यिन। ५दाकपी तिवाला क बिन्दुप तेन्दोक ति तिवा सेम टेड्बु ताड नासाम ल्यामु वोतुप ताड तेपा टेड्बु क्यानी ड्रियङ्ज्ये कि ज्यितुपला यिन। ६यिने ललाइ मीतिवा तुका ताम्डेला क्युर ज्याकनी ताम्डे मेशोलोकला येनी देन वे। ७तिवा खोप्राडला ति मोशाकी

ठिमकी गेकेन सिरुप नोकिवी, यिने तिवी खोप्रे क्यावु ताम्डे ताड तेन्तेन क्यानी लापुप ताम्डे ति खोप्राडला राड ल्यामु हाकमोकोवी।

८ल्यामु क्यानी ती ठिमला सिक्यावु दोके मिजी क्याङ्सुड सिसिन ती ठिम ति ल्यामु वे सिरुप ति दाकपुला छ्या वे। ९ती ठिम ति मी टेड्बुकी थोक्ला मिन, यिने ठिमला मुयुकुपतिवा ताड सिक्यावु ताम्डेला मेड्येन्दुपतिवा ताड कोन्छ्योकला मेतेन्दुपतिवा ताड दिक्छेनतिवा ताड मेटेड्बुतिवा ताड कोन्छ्योकला मारे तोङ्गुपतिवा ताड पपाआमा ताड मी यम्बाला सेतुप मीतिवी थोक्ला ताड १०शम्डेन कितुपतिवा ताड ख्योकपेजा ख्योकपेजी मुला डोजु मेतुप लाका कितुप ताड मीतिवाला लुनी चोङ्गुपतिवा ताड जिनोक जोपतिवा ताड जिनोक जोनी न क्योलुपतिवा ताड येन्देन टेड्बुकी तेन्दोकला लङ्गुपतिवी थोक्ला यिन। ११दाकपी येन्देन ति मोलाम नङ्गुप कोन्छ्योक टेड्बुकी मोवा वोतुप लेन ल्यामु ताड मुला डिकिवी। ती ति खोकी डला चेक तेन नङ्नी वे।

कोन्छ्योककी च्यम्बाकी थोक्ला थुचिछे पुलुप

१२डला डार नङ्गुप दाकपी चोवो ख्रीष्ट येशूला थुचिछे बुलिन, च्यिलासिसिन खोकी खोरुडला शब्ज्यी कितुपकी थोक्ला डला खोड्तेर्मु वोतुप

सिनी चिसुड। १३गोमाला याड डे खोला मारे तड्नी तेपा कितुपतिवाला दुक्पा बिन्नी ड्यपच्ये क्यायिन। ती ति डे खोला तेपा माक्यावु पेला हाक्माकोनी क्यावु तप्की तन्दा खोकी डला च्यम्बा नाड्सुड। १४चोवोकी डला नड्गुप कटिन ति छासेकी ग्येर्पु वे। तोजो तिराड मिन, खोकी डला ख्रीष्ट येशूला वोतुप तेपा ताड ड्रियड्ज्ये बडी क्या नाड्सुड।

१५दी सुड ति मी तेरीकी यिन्ज्यिक मिन्ज्यिक सेमला लिड गोकिवी। च्यिलासिसिन दी सुड ति दिक्छेनतिवाला दिक्पा ने थर ज्यितुपला येशू ख्रीष्ट दी जम्बुलिडला फेपुपकी कोर्ला यिन। ती दिक्छेनतिवी नाड्ला तेरी सिनाड दिक्छेन ति ड राड यिन। १६यिन्सिनाड कोन्छ्योककी डला च्यम्बा नाड्सुड। च्यिलासिसिन ड दिक्छेन यिन्सिनाड डे मिजी नेसुर येशू ख्रीष्टकी छासेकी हम क्या देतुप ओड छ्या तेन्नी खोला तेपा क्यानी नाम्साड मिशिवु मिजी थोपुपकी थोक्ला ड ति पड्बु च्युड्गुप यिन। १७तमा थल्मा नेज्यु नरीकी नरी सेक ज्यु वोतुप दाक्पी मिक्की मोथोड्गुप ग्येल्बु ताड च्यिक राड वोतुप कोन्छ्योकला ताड्देन ताड मोवा ति नरीकी नरी वुड्शी। आमिन।

तिमोथीकी कि राड गोवु लाका

१८डे ड्रियड्ज्येवु आड तिमोथी, गोमाला के कोन्छ्योककी लुड्तेम्बातिवी

ख्योरो थोक्ला नमदर शेतुप ताम्डे दोके ड येलुड क तेरिन। मक्मीतिवी डाडेड क्यानी थमु ग्यकुप दोके क्यानी चोवो कोन्छ्योककी थोक्ला लाका ल्यामु की। १९तमा येशू ख्रीष्टला तेपा कितुप ताड सेम टेड्बु क्यानी दे। ललाइ ललाइकी सेम टेड्बु माक्यानी खोरो क्यावु तेपा साड ना गाल्सुड। २०तिवी पर्ला हुमेनियस ताड अलेक्जेन्डर साड यिन। तिवी कोन्छ्योकला मारे तोड्गुप मेड्नोक सिरुप ति हाक्कोशी सिनी डे तिवाला शैतानकी लकला ख्येल च्यितुप यिन।

कोन्छ्योकला सोवा देकुप कोर्ला येन्देन

२ तेरी सिनाड गोमाला ड ख्युरुडला ठाकुरे सिरिन। तेपा कितुप तेरी मीतिवी थोक्ला ख्योरो कोन्छ्योकला गोड्बा शुनी मोपोर कितुप ताड खोला थुचिछे पुल। २तमा ग्येल्बुतिवा ताड ग्येल्वी ओड्ला लाका कितुप मी छ्येतिवा तेरीकी थोक्ला साड मोपोर की। तुक क्यासिन दाक्पु लोदिमु क्यानी कोन्छ्योकला सोवा देकुप ताड ल्यामु वोतुप मिजी क्योड थुप्शी। ३दी ति दाक्पुला दिक्पा ने थर ज्यितुप कोन्छ्योककी थोड्दाडला ल्यामु ताड खोला सोवा देक छ्योवु डिवी। ४मीतिवा तेरी दिक्पा ने थर्नी टेड्बु वोतुप कोन्छ्योककी रिक्पा ड्येशी सिरुप ति कोन्छ्योककी नोवा यिन।

५कोन्छ्योक ति च्यिक राड ज्यु वे। तमा कोन्छ्योक ताड मीतिवी पर्ला डिकनी तम्जी ल्यामु जोप मिरा च्यिक वे। ती मी ति ख्रीष्ट येशू यिन। ६खोकी तेरी मीतिवाला दिक्पा ने थर ज्यितुपला खोरे मिजी साड मी थोकला जिन्बा च्युङ्सुड। तीकी कोर्ला पड्बु छ्या देन्दुप टेके तुजे ति तन्दा राड यिन। ७तीकी थोकला ड खोकी सुड ख्याप्टाक कितुपला लोमा छ्ये च्युङ्गुप यिन। तुक क्यानी ड यहूदी मिन्दुप मिरिक यम्बाकी मीतिवाला तेपा कि ज्यितुपला ताड टेड्बुकी कोर्ला लोपुप गेकेन साड च्युङ्गुप यिन। दी ताम्डे ती टेड्बु सिरिन, जिनोक मिन।

८ती तप्की तेरी जोम्नी सोवा देकुप पेला ख्योकपेजातिवी सेमला डियर्मु मिकिवु ताड खाँदा माक्यानी क्यान मेतुप लाक्पा लाङ्नी मोपोर किशी सिरुप ति डे नोवा वे। ९तुक राड क्यानी पुम्पेजातिवी साड छ्येजु कितुप मिन, कुसु ज्यम्बु क्यानी दाक दाक्पुला पोमु वुङ्गुप मज्यातिवा कोन्शी। ज्ह ल्हामा ल्हानी मज्या ल्यामु कोन्नी छ्यानी सेर ताड मोती ताड गोड नावु मज्यातिवा कोन्नी मिन, १०यिने किताड नालु ल्यामु वुड गोकिवी। तुक कितुप ति कोन्छ्योकला मोवा कितुप पुम्पेजातिवाला पोमु गिवी। ११पुम्पेजातिवा खरक्पा सोक सोके देतुप ताड ओड वोतुप

मीतिवी खला ड्येन्दुपला लोप्शी। १२पुम्पेजातिवी ख्योकपेजाला लोपुप ताड ख्योकपेजाला ओङ्ज्येन कि सिनी ड मिसिर, यिने तिवा खरक्पा सोक सोके देशी। १३च्यिलासिसिन थल्माला कोन्छ्योककी आदमला जो नङ्गुप यिन, ती ज्युकला पुम्पेजा हव्वाला जो नङ्गुप यिन। १४आदम ति शैतानकी जिनोकला ख्येलुप मिन, पुम्पेजा ति शैतानकी जिनोकला ख्येलनी दिक्पाला शोरुप यिन। १५यिने पुम्पेजातिवी येशूला तेपा कितुप ताड ड्येङ्ज्ये कितुप ताड टेड्बुकी मिजी क्याङ्सुड सिसिन आडा क्येप पेला कोन्छ्योककी तिवाला ज्होकिवी।

चर्चला गोमा कितुप मीतिवाला पावलकी टोङ्गु

३ दी ताम्डे ति लो तेन गोवु यिन। चुका मी तीकी चर्चला गोमा कितुप नो किवे, तीकी ल्यामु राड कितुप नो क्यावु यिन। २यिने तुका चर्चला गोमा कितुप मीतिवा ति क्यान मेतुप ताड पेर्मी च्यिक राड वोतुप ताड काड किसिनाड छे क्यानी कितुप ताड सेम थिला ज्योकुप ताड मीतिवी ताङ्देन क्यावु ताड डेन्बुला ताङ्देन कितुप ताड येन्देन लोप थुपुप वुड गोकिवी। ३तमा छ्याङ्गोले मिकिवु ताड टिम्बु डियर्मु मिकिवु, यिने कुसु ज्यम्बु वोतुप ताड थमु मग्यकुप ताड नोरला दर्पा मिकिवु ताड ४खोरो

खाड्बा शिड ल्यामु कि थुपुप ताड पेजातिवी खुरुडला ताड्देन क्यानी खला इयेमु जोवु वुड गोकिवी। ५दोजो तीकी खोरो खाड्बीतिवाला साड डेकला ज्योक माथ्पुसुड सिंसिन चर्चला चुक क्यानी डेकला ज्योक थुप्किवी रो? ६तमा चर्चला गोमा कितुप मी ति मलोक तेपा क्यावु मी साड वुड्गुप मेवी। मिसियाड तीकी खुरुडला ड राड यिन सिवी, तमा कोन्छ्योककी शैतानला ना तड्गुप दोके क्यानी तीला पर्च्याला ख्येल्वि। ७तुका मी ति येशूला तेपा माक्यावु मीतिवी थोड्दाडला साड ल्यामु वुड गोकिवी। तुक क्यासिन मीतिवा तीकी तेन्दोकला मलाडिगवी, तमा शैतानकी ओडला साड मेख्येल्वी।

चर्चला लहाटे कितुप मीतिवाला पावलकी टोड्गु

८तुक राड क्यानी चर्चला लहाटे कितुप मीतिवा साड नासाम ल्यामु तोड्गुप वुड गोकिवी। तन्दा राड च्यिक तन्दा राड च्यिक सिरुप ताड छ्याङ्गेले कितुप ताड नोरला देर्पा कितुप मिन, ९यिने तिवा खोरो क्यावु तेपाला टेड्बु वोतुप ल्यामो हाक्कोनी नरी सेम टेड्बु क्यानी ज्योकुप वुड गोकिवी। १०तुका मी ति गोमाला ल्यामु वोतुप मेतुप ल्हो, तमा क्याने मेतुप पड्बु वोसिन तिराड चर्चला लहाटे कितुप लाका किशी। ११तुक राड क्यानी तिवी पेर्मीतिवा

साड किताड नालु ल्यामु वोतुप ताड मीला मारे मोतोड्गुप ताड डेकला देतुप ताड तेरी ताम्डेला खोड्तेर्मु वुड गोकिवी। १२चर्चला लहाटे कितुप मी ति पेर्मी च्यिक राड वोतुप वुड गोकिवी। खोरो पुज्युडपुमतिवा ताड खाड्बा शिड ल्यामु क्यानी च्योम च्योम कि थुपुप वुड गोकिवी। १३सी चर्चला ल्यामु लहाटे किवे, तिवाला मीतिवी साड ताड्देन किवी। तमा तिवी येशू ख्रीष्टला तेपा रम्बु क्यानी मीतिवाला साड डाडेड क्यानी लोप थुप्किवी।

येशूला तेपा क्यावु तेन्दोक ति छासे छ्ये वे

१४ड ख्योरो ते डमु राड वुड्गुप नो वे। यिन्सिनाड दी यिकी ति डे ख्युरुडला टिवु यिनो। १५ड वुड्गुप फिमु गल्सिनाड दी यिकी रानी दाक्पु कोन्छ्योककी मिछाडला चुक क्यानी मिजी क्योड गोकिवी सिरुप ति हाक्कोवा किसान। ती कोन्छ्योककी मिछाड ति डोसु वोतुप कोन्छ्योककी चर्च यिनो। ती चर्च ति सुड टेड्बुकी डम्ज्यी रम्बु ताड कज्यु यिन। १६वुतुड के छ्याकला वोतुप दाक्पी क्यावु तेपाकी तेन्दोक ति छासे छ्ये वे।

“येशू ख्रीष्ट ति मी जुजमला दी जम्बुलिडला फेप्सुड।

तमा कोन्छ्योककी थु चाड्माकी खोला टेड्बु वोतुप सिनी चिसुड।

खो देवाच्येनकी लेन क्योलुप
 थुतिवी पर्ला थोड्सुड।
 तमा खोकी कोर्ला लुड्बा
 लुड्बाला ख्याप्ताक
 क्यासुड।
 जम्बुलिडकी मीतिवी खोला तेपा
 क्यासुड।
 येलुड कोन्छ्योककी खोला
 ताड्देन ताड क्यानी
 देवाच्येन ने तेकनी फेप्सुड।”

येन्देन मेटेड्बुकी कोर्ला

४ कोन्छ्योककी थु चाड्माकी
 टेड्बु सुडिगवी। तिड्मी तुजेला
 जिनोक जोप ज्हेन्डी ताड डेकी
 ताम्डेला ड्येन्नी मी ललाइकी तेपा
 कितुप क्युर्नी ज्योकिवी। ३ती तेरी
 येन्देनतिवा ति मी खोनकपुतिवा नेसुर
 गिवी। तिवी सेम ति शैतानकी ति यिन
 सिनी च्या छेन्दी थवोनी डाम ग्यपुप
 दोके यिन। ३तिवी जेन्दी कितुप मेवी,
 ललाइ समा साड साप मेवी सिनी
 ग्येकिवी। यिने ती समातिवा ति तेपा
 कितुपतिवा ताड टेड्बु काड यिन
 सिनी डो शेवुतिवी थुचिछे पुलनी
 सापला कोन्छ्योककी ज्ये नड्गुप
 यिन। ४कोन्छ्योककी ज्येवु तेरी
 च्यालकतिवा ल्यामु वे। तुक क्यानी
 थुचिछे पुलनी सोसिन साप मेवी
 सिनी सि मोगोवी। ५च्यिलासिसिन
 तिवा ति कोन्छ्योककी सुड ताड
 खोला मोपोर क्यासिमा चाड्मा
 वुडिगवी।

येशू ख्रीष्टला शब्ज्यी ल्यामु बुलुप कोर्ला

६ती येन्देन ति ख्योरो अच्युनुपतिवाला
 साड लाप्सुड सिंसिन ख्योरो तेपा
 क्यावु सुड ताड येन्देन टेड्बुला
 सिक्कावु दोके मड रम्बु च्युड्नी
 ख्युरुड येशू ख्रीष्टकी थोक्ला लाका
 ल्यामु कितुप डिवी। ७कोन्छ्योकला
 मोवा मेतुप ताड तेन्दोक मेतुप
 पतिवा नेसुर ख्युरुड कुतुक दे। तमा
 खोला मोवा कितुपला तालिम की।
 ८च्यिलासिसिन जुकी थोक्ला तालिम
 क्यावु ति चेयी तिराड फेन थोकिवी।
 यिने कोन्छ्योककी थोक्ला तालिम
 क्यावु ति तेरी ताम्डेला फेन थोकिवी,
 तमा ज्युक्थमाला कोन्छ्योककी
 थाक्छ्येन नड्गुप नाम्साड मिशिवु
 मिजी थोप्किवी। ९दी ताम्डे ति टेड्बु
 वोतुप ताड तेरीकी सेमला लिड गोवु
 वे। १०तीकी थोक्ला राड दाक्पु हुर्ताक
 ताड टेमु कियी वे, च्यिलासिसिन
 दाक्पी रेवा ति डोसु वोतुप
 कोन्छ्योकला वे। खो ति मी तेरीकी
 कोन्छ्योक यिन, खोकी खक्छ्येवुला
 तेपा कितुप मीतिवाला दिक्पा ने थर
 ज्यिकिवी।

११तीकी कोर्ला मीतिवाला क
 बिन, तमा तिवाला लोप। १२ख्युरुड
 नाज्युड वे सिनी सी साड ख्युरुडला
 मो मेबेष्ठी, यिने मीतिवी थोड्दाडला
 ताम्डे लप्ताड ताड किताड नालु
 ताड ड्यिड्ज्ये ताड तेपा ताड टेड्बु

वोतुप पड्बु छ्या तेन। १३तमा ड वुड्दा सेक ख्योरो मीतिवाला कोन्छ्योककी सुड रानी तेरुप ताड ख्याप्टाक कितुप ताड येन्देन तेरुपला ड्याम की। १४ख्युरुडला थोपुप कटिनकी ड्येम्बाला खोड्याम की। ती कटिनकी ड्येम्बा ति चर्चकी गोमा कितुपतिवी ख्योरो गोला लाकपा ज्याक्नी मोपोर कितुप पेला नम्दर शेनी ख्युरुडला थोपुप यिन। १५ख्योरो कि गोवु लाकातिवा तेरी किसान, तमा ती लाकाला राड नरी ज्युनी देता। तुक क्यासिन ख्योरो मिजी ताड ख्युरुड मड ल्यामु गलुप ति तेरी मीतिवी थोडिगवी। १६ख्योरो थोकला ताड ख्योरो लोपुप येन्देनकी थोकला च्याड्से क्यानी देता। ख्योरो नरी तुक क्यासिन ख्युरुड ताड ख्योरो ख्याप्टाक क्यावु सुड ड्येन्दुप मीतिवा साड ज्होकितो।

चर्चला वोतुप युक्सिमतिवी कोर्ला

५ ख्युरुड सिनाड मी गावाला वोरु मादेन, यिने पपाला दोके टोड्गु बिन। ख्युरुड सिनाड छ्युडातिवाला ति रडगी नुपतिवाला दोके क्यानी खाखो की। २मी गामातिवाला रडगी आमाला दोके ताड पुम्पेजा नाज्युडतिवाला सेम टेड्बु क्यानी रडगी नुम दोके नासाम तोड। ३वुतुड के युक्सिम फोकुपतिवाला लहाटे की। ४यिने ललाइ युक्सिमकी ति खोरो पुज्युडपुम याङ्ना नातीनातिनीतिवा

वोसिन, तिवी राड तीला दाल्जा किशी। च्यिलासिसिन तिवी खोप्रे खाड्बा राड टेड्बुकी लाका कितुप ताड खोप्रे पपाआमी ठिलेन च्योलुप लोप्शी। ती ति कोन्छ्योककी थोड्दाडला ल्यामु यिन। ५यिने खोरो ति सु साड मेतुप युक्सिमतिवी वुतुड के कोन्छ्योकला तिराड रेवा क्यावु गिवी। तमा ड्यी ताड नुप्ज्या खोला राड गोड्बा शु शुवा देकिवी। ६दोजो ललाइ युक्सिमतिवा गा ताड किर्मुला तिराड येनी देकिवी सिसिन तिवा सेन्बुला राड शेष दोके यिन। ७तुक क्यानी तिवा क्यान मेतुप च्युड्नी देशी सिनी तिवाला दी येन्देन बिन। ८ललाइ ललाइकी याड खोरो छेड्गाछालीतिवा ताड खकछ्येवुला खोरो मिछाडला साड लहाटे मिक्किवी। तुकातिवी तेपा कितुप साड क्यानी ज्यकुप गिवी, तमा तिवा तेपा मिक्किवुतिवा सिनाड मड दुक्टा डिवी।

९लो खल टुक सिनाड लहक्पा लेपुप युक्सिमतिवाला तिराड युक्सिम यिन सिनी युक्सिमतिवी मिड ति थो ग्यप। ती ति ख्योवा च्यिककी मुला तिराड जेन्दी क्यावु वुड गोकिवी। १०तीकी पुज्युडपुमतिवा ल्यामु क्यानी ज्होलुप ताड खोरो खाड्बा वुड्गुप डेन्बुतिवाला ताड्देन क्यावु ताड कोन्छ्योकला तेपा कितुपतिवाला शब्ज्यी क्यावु ताड दुक्पाला ख्येलुपतिवाला दाल्जा किटे कितुप

ताड लाका काड साड ल्यामु क्यानी मी यम्बाला खोरो किताड नालु ल्यामु वोतुप ति छ्या तेन्दुप वुड गोकिवी। ११यिने नाज्युड वोतुप पेला राड युक्सिम फोकुप पुम्पेजातिवाला ति युक्सिम यिन सिनी मिड थो माग्यक। च्यिलासिसिन तिवा जेन्दी कितुप नासाम शर्नी ख्रीष्टकी थोकला शब्ज्यी कितुप क्युर ज्याकनी जेन्दी कि थुष्किवी। १२तमा तिवा गोमाला येशू ख्रीष्टला तिराड शब्ज्यी कितुपला थाक्छ्येतुप ति क्युर ज्याकनी क्येन फोकिवी। १३तो जो तिराड मिन, तिवा खाड्बा खाड्बाला युक्पु ताड छेरा कितुप ताड ताम्डे क्योलुप ताड मी लाकाला लाक्पा जिम्बुप ताड लप मोगोवु ताम्डेतिवा लपुप डिवी। १४ती तप्की नाज्युड वोतुप पेला राड युक्सिम फोकुप पुम्पेजातिवा जेन्दी क्यानी पेजातिवा क्येनी खाड्बा शिड क्यानी सशी। तमा दाक्पी डतिवी दाक्पुला ताम्डे जोप लाम मेड्येशी। १५च्यिलासिसिन ललाइ ललाइ युक्सिमातिवा याड गोमाला के येशूला तेपा कितुप क्युर ज्याकनी शैतानकी थाकाला गल वे। १६यिने तेपा कितुप पुम्पेजातिवी ति ललाइ छेड्गाछाली युक्सिम वोसिन तीला दाल्जा किटे किशी। तुक क्यासिन चर्चला काड साड कले मेख्येल्वी। तमा खोरो मी सु साड

मेतुप युक्सिमतिवाला तिराड चर्चकी दाल्जा कि थुष्किवी।

चर्चला गोमा कितुप मीतिवाला टोङ्गु

१७चर्चला लहाटे क्यानी गोमा कितुप मीतिवाला तेरीकी दोम्बा ड्यी ताड्देन कि गोकिवी। खक्छ्येवुला कोन्छ्योककी सुड ख्याप्ताक कितुप ताड लोपुप मीतिवाला मड ताड्देन की। १८कोन्छ्योककी सुडला “स्वा ड्यिलुप लाडगी खला खप्चिल माग्येक।”* सिनी सुड वे। तमा “लाका कितुप मीला तीकी लाका क्यावु ल थोप गोकिवी।” सिनी साड सुड वे।* १९मिरा ड्यी सुमकी पड्बु मेसिन चर्चला गोमा कितुप मीतिवी तेन्दोकला क्येन तेरुप मीतिवी ताम्डेला माड्येना।* २०चर्चला तुका दिक्पा कितुप मीतिवा वोसिन तिवाला मी तेरीकी मिङ्गाला ज्याकनी तुक कितुप मेवी सिनी लोप। तुक क्यासिन यम्बा तेपा कितुप मीतिवा साड ज्यिवा किवी।

२१कोन्छ्योक ताड येशू ख्रीष्ट ताड कोन्छ्योककी पेन नङ्गुप देवाच्येनकी मीतिवी थोड्दाडला ड ख्युरुडला क छ्येम्बु तेरिन। ख्ये मापेवा क्यानी ख्युरुड डे सिक्पावु ठिमला वोतुप दोके क्यानी किसा। २२सुला साड रिवा क्यानी गोला लाक्पा ज्याकनी चर्चला गोमा कितुप

लाका कि माज्यी। ख्युरुड दिक्पा कितुप मीतिवी दला माशुक, यिने टेड्बु क्यानी मिजी क्योड।

२३ गोमाला दोके छ्यु तिराड थुङ्गुप मिन, यिने ख्योरो खोक्पी थोक्ला ताड येलुड येलुड मानाशी सिनी गुन्दुम छ्याड साड चे चेयी थुड।

२४ ललाइ ललाइ मीतिवी दिक्पातिवा ठछ्येली थोङ्गिगी, तमा ठिमला डोप गोमाला के हाक्कोकिवी। यिने ललाइकी दिक्पातिवा ति ज्युक्ला तिराड थोङ्गिगी। २५ तुक राड क्यानी मीतिवी क्यावु लाका ल्यामुतिवा साड ठछ्येली थोङ्गिगी। ललाइकी क्यावु ठछ्येली मेतुप लाका साड छ्याकला लु मुथुपी, डियम्जिक ठछ्येली थोङ्गिगी।

योक्पुतिवी कोर्ला टोङ्गु

६ तेपा कितुप योक्पुला देतुपतिवा तेरीकी दाक दाक्पी ज्यिन्दाकला ताड्देन की। तुक क्यासिन सी साड कोन्छ्योककी मिड ताड दाक्पी बिन्दुप येन्देनला मारे मोतोङ्गिगी। २ ख्यिराड तेपा कितुप योक्पुतिवा ज्यिन्दाककी वोक्ला लाका कितुप पेला तिवा दाक्पी तेपा कितुप अच्युनुप राड यिन सिनी ताड्देन कितुप ताड तिवाला मड ल्यामु क्यानी शब्ज्यी की। च्यिलासिसिन ख्यिरा लाका ल्यामु क्यासिमा ज्यिन्दाकला ख्येप्साड वुङ्गिगी। ती ज्यिन्दाक

ति तेपा कितुप ख्यिरा डियङ्ज्येवु अच्युनुपतिवा यिन। दी ताम्डे ति ख्यिराड ल्यामु क्यानी येन्देन तेरुप ताड ख्याप्टाक की।

येन्देन मेटेड्बु ताड टङ्गा डेवाला चा कितुप कोर्ला

३ दोजो मी ललाइकी येन्देन मेटेड्बुतिवा लोप्किवी, यिने दाक्पी चोवो येशू ख्रीष्टकी खक्छ्येवु सुड ताड दाक्पी मोवा कि गोवु येन्देनकी मुला मिडिकिवी सिसिन, ४ तुका मी ति ड राड यिन सिनी सिवी, तीकी काड साड येन्देन शेवु मेवी। तमा तीकी तेन्दोक मेतुप ताम्डेला केवुल कितुप तिराड क्यानी ताम्डे छिक रे रेला थमु ग्यकुप छोल्लिगी। तीकी जोसालेन्सिन ठतोक कितुप ताड खाँदा शोरुप ताड मारे तोङ्गुप ताड नाम्दोक मेलोवातिवा वुङ्गिगी। ५ तमा तुका मी तीकी सेम ना गलुप ताड टेड्बुला क्युर्नी ज्यकुप मीतिवी मुला खाँदा क्या क्यावा किवी। तमा तिवी कोन्छ्योकला मोवा कितुप ति ख्येप्साड वुङ्गुप यिन सिनी नोकिवी।

६ यिन्सिनाड सेमला लो दिवु क्यानी कोन्छ्योकला मोवा कितुप ति ख्येप्साड यिन। ७ च्यिलासिसिन दाक्पु क्येप पेला दी जम्बुलिडला काड साड खुर्नी वावु मिन, याङ्ना काड साड खुर्नी डो साड मुथुपी। ८ तुक क्यानी साप कोन्दुप चोयी

लडिसन दाक्पु तीला राड लो दिवा कि गोकिवी। ६यिने छ्युकुपु डोप नो कितुपतिवा शैतानकी जिनोकला ख्येलनी तोर्वाला ख्येलुप दोके डिवी। तमा तिवा अम्बारडिशड कितुप ताड मीला ना तोङ्गुप नासाम तिराड तङ्नी खोरो राड खुरुडला मेटाला जोनी ना डिवी। १०च्यिलासिसिन टङ्गा डेवाला चा कितुप नासाम नेसुर राड तेरी परकी दिक्पातिवा गिवी। टङ्गी देर्पाला ख्येलनी ललाइ मीतिवा तेपा कितुप क्युनी ज्योकिवी, तमा तिवा सेमला छासे पप लडिगवी।

पावलकी बिन्दुप तिङ्मी टोङ्गु

११यिने ख्युरुड ति कोन्छ्योककी गिपा यिन्दुप तप्की तुका ताम्डे मेलोवातिवा नासाम माताङ्नी टेङ्बु ताड मोवा ताड तेपा ताड ड्रियङ्ज्ये ताड हम कयानी देतुप ताड कुसु ज्यम्बु कितुप छोल। १२तमा चिर्मु चेपला छ्योङ्बाल ग्यकुप मी दोके तेपा रम्बु कयानी नाम्साड मिशिवु मिजी ड्ये थुपा की। तीकी थोकला राड कोन्छ्योककी ख्युरुडला पेन नङ्गुप यिन। तीकी कोर्ला ख्योरो मी बडीकी मिङ्गाला पङ्बु साड बिन्दुप यिन। १३मी तेरीला मिजी नङ्गुप कोन्छ्योक ताड पन्तियस पिलातसकी दोङ्गला पङ्बु टेङ्बु नङ्गुप येशू ख्रीष्टकी थोङ्दाडला १४ड ख्युरुडला क तेरिन। दाक्पी

चोवो येशू ख्रीष्ट माफेवा सेक ख्युरुड ल्यामु कयानी खोकी सुडला वोतुप क दोके मिजी क्योड। तमा सी साड ख्युरुडला मेटेङ्बु ताड क्येन तेर मुथुपी। १५कोन्छ्योककी तुजे छेसिमा चोवो येशू ख्रीष्ट ति येलुड फेक्किवी। कोन्छ्योक ति च्यिक राड वोतुप ताड ग्येल्वी खकी ग्येल्वु ताड चोवी खकी चोवो यिन। खोला दाक्पी सोवा बुल्गिवी। १६खो तिराड नरीकी नरी लुवु वे। खो ति वोसिरला ज्युकिवी, तमा ती वोसिरकी चिप्ला सु साड डो मुथुपी। खोला सी साड नाम्साड माथोड वे, याङ्ना थोड साड मुथुपी। खोला राड ताङ्देन ताड ओङ्ज्येन ति नरीकी नरी वुङ्शी। आमिन।

१७दी जम्बुलिडकी मी छ्युकुपतिवाला दुक सिनी क बिन, “अम्बारडिशड माकी, चेयी पर सेक तिराड लुवु टोङ्बाला मिन, यिने दाक्पुला गोवु तेरी च्यालकतिवा लोदिमुकी थोकला ग्यक्चे कयानी नङ्गुप कोन्छ्योकला तिराड रेवा की।” १८तमा तिवाला “मी यम्बाला ल्यामु कितुप ताड लाका ल्यामु कितुप सेम वोतुप ताड सेम बोल्मु वोतुप ताड रङ्गी लोला वोतुप टोङ्बातिवा कतुकारला ख्येलुपतिवाला तेरुप सेम वोतुप च्युड गोकिवी।” सिनी क बिन। १९तुक कयानी तिवा डम्ज्यी रम्बु तिङ्गुप दोके खोपे थोकला ज्युकथमी नासाम तङ्नी मिजी टेङ्बु क्योड थुप्शी।

२०आड तिमोथी, कोन्छ्योककी

ख्युरुडला काड लाका चेक तेन
नड वे, ती ति ल्यामो कयानी ज्होकनी
ज्योक। तेन्दोक मेटुप ताम्डेतिवा
क्युर्नी ज्योक। तिवी रिक्पा वोतुप यिन
सिवी, यिने ती वुतुङ्की रिक्पा मेटुप

मीतिवी ताम्डे नेसुर कुतुक दे। २१ती
रिक्पा मेटुप ताम्डेकी जोसालेन्सिन
ललाइ मीतिवा तेपा कितुप साड
क्युर्नी गल वे। कोन्छ्योककी कटिन
ति नरी ख्योरो मुला लुशिता।

